


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-74	Al-Muddatstsir	56	2	Makkiyyah	Ke-4	7



Zaman Diturunkan

1. 7 Ayat di permulaan Surah al-Muddatstsir diturunkan selepas 5 ayat di permulaan Surah al-'Alaq. Ia merupakan wahyu kedua yang diturunkan kepada Rasulullah. Ketika Rasulullah s.a.w. berjalan-jalan, tiba-tiba Baginda mendengar satu suara dari langit, setelah mendongak ke atas Nabi s.a.w. nampak malaikat yang telah datang kepadanya di gua Hiraa' sebelum itu, lalu Baginda pulang segera ke rumah sambil berkata kepada orang-orang di rumahnya **ذَرُونِي** (selimutkan aku), pada ketika itulah turun 7 ayat di permulaan Surah al-Muddatstsir. Shahih Bukhari, Kitab Tafsir, Bab Tafsir Surah al-Muddatstsir, hadits 4,638 daripada Jabir bin `Abdillah.
2. Ayat-ayat di tengah surah ini iaitu bermula dari ayat ke-8 hingga ke-25 diturunkan berkenaan ketua orang-orang kafir Quraisy yang bernama Walid bin al-Mughirah, setelah da'wah secara terbuka bermula. Ia diturunkan sekitar tahun ke-4 Kenabian, dialah orang yang mengatakan al-Qur'an sebagai sihir dan kalam manusia. Di dalam ayat ke-26 hingga ke-56 manusia diingatkan dengan hal ehwal di hari akhirat, bahagian ini juga diturunkan di peringkat ke-2 kehidupan Rasulullah iaitu setelah da'wah secara terbuka dilancarkan.

Perkaitan Surah Al-Muddatstsir Dengan Surah Sebelum Dan Selepasnya

1. Di dalam ayat ke-19 Surah al-Muzzammil, al-Qur'an telah disebutkan sebagai nasihat (Ayat: 19).

إِنَّ هَذِهِ تَذْكِرَةٌ ۖ فَمَنْ شَاءَ اتَّخَذْ إِلَىٰ رَبِّهِ سَبِيلًا ﴿١٩﴾

19. Sesungguhnya (keterangan-keterangan yang mengandungi amaran) ini menjadi peringatan. Oleh itu sesiapa yang mahukan kebaikan dirinya dapatlah ia mengambil jalan yang membawa kepada Tuhannya (dengan iman dan taat).

Di dalam Surah al-Muddatstsir ini juga perkara yang sama disebutkan tetapi dalam gaya bahasa yang lain (Ayat: 54).

كَلَّا إِنَّهُ تَذْكِرَةٌ ۖ فَمَنْ شَاءَ ذَكَّرْهُ ﴿٥٤﴾

54. Ketahuilah! Sesungguhnya Al-Quran itu adalah satu peringatan (yang sangat besar pengajarannya);

55. Oleh itu sesiapa yang mahu (beringat) dapatlah ia mengambil peringatan daripadanya.

Di dalam kedua-dua surah disebutkan bahawa manusia mempunyai kebebasan memilih agama, agama Islam tidak akan dipaksakan kepada sesiapa pun untuk menerimanya.

2. Di dalam Surah al-Muddatstsir dikatakan tentang pemimpin-pemimpin Quraisy yang banyak melakukan jenayah bahawa mereka akan mengaku di akhirat nanti bahawa mereka semasa di dunia dahulu tidak percaya kepada hari kemudian (Ayat: 46).

وَكُنَّا نُكَذِّبُ بِيَوْمِ الدِّينِ ﴿٥١﴾

46. "Dan kami sentiasa mendustakan hari pembalasan

Di dalam Surah al-Qiyaamah selepas ini disebutkan bahawa kiamat pasti akan berlaku, dalil-dalil عقلي, نقلي dan انفسى diberikan sebagai bukti adanya dan pasti akan berlakunya hari kiamat.

3. Surah al-Muddatstsir menggambarkan sikap pemimpin-pemimpin Quraisy yang degil dan sombong, mereka bukan hendak menerima Rasulullah sebagai utusan Allah sebaliknya mahu kitab-kitab dari langit diturunkan kepada mereka dan mahu juga mereka dijadikan sebagai rasul (Ayat: 52).

بَلْ يُرِيدُ كُلُّ امْرِئٍ مِنْهُمْ أَنْ يُؤْتَى صُحُفًا مُنشَرَةً ﴿٥٢﴾

52. (Mereka tidak merasa cukup dengan peringatan itu) bahkan tiap-tiap seorang di antaranya mahu supaya diberi kepadanya lembaran surat yang terbuka (yang diturunkan dari langit untuk dibaca oleh mereka sendiri).

Di dalam surah ini tersebut beberapa sikap buruk Walid bin al-Mughirah yang merupakan salah seorang ketua orang-orang kafir Quraisy Mekah. Di dalam surah akan datang pula disebutkan beberapa sikap buruk Abu Jahal.

Beberapa Kata Kunci Dan Tema Utama Surah

1. Rasulullah s.a.w. diperintahkan supaya memberi ancaman (إنذار) menggunakan al-Qur'an, ثُمَّ فَأَنذِرْ. Di dalam al-Qur'an terdapat perincian tentang azab neraka. Itu juga sebagai ancaman dan peringatan kepada manusia (Ayat: 36).

نَذِيرًا لِلْبَشَرِ ﴿٣٦﴾

36. Yang menjadi amaran bagi umat manusia

Sebagai bantahan kepada tuduhan yang dibuat oleh Walid bin al-Mughirah terhadap al-Qur'an bahawa ia sihir atau hanya kalam manusia, al-Qur'an disebutkan di dalam surah ini sebagai نَذِيرَة (nasihat).

2. Di dalam surah ini terdapat perbandingan di antara ahli syurga (أَصْحَابُ الْيَمِينِ) dan ahli neraka (مُجْرِمِينَ).

كُلُّ نَفْسٍ بِمَا كَسَبَتْ رَهِينٌ ﴿٣٨﴾ إِلَّا أَصْحَابَ الْيَمِينِ ﴿٣٩﴾ فِي جَنَّاتٍ يَتَسَاءَلُونَ ﴿٤٠﴾ عَنِ الْمُجْرِمِينَ ﴿٤١﴾

38. Tiap-tiap diri terikat, tidak terlepas daripada (balasan buruk bagi amal jahat) yang dikerjakannya,

39. Kecuali puak Kanan,

40. (Mereka ditempatkan) di dalam Syurga (yang penuh ni`mat), mereka bertanya-tanya,

41. Tentang (tempat tinggal) orang-orang yang bersalah.